

Verbâl de Assemblee Gjenerâl Ordenarie dai 8 di Març dal 2020

Clamade adun cun letare dai 14 di Zenâr dal 2020, prot. nr. 007/20, daûr dal art. 10 dal Statût,

- in prime convocazion, sabide ai 7 di Març dal 2020, a 11 sot sere;
- in seconde convocazion, domenie ai 8 di Març dal 2020, a 10 di buinore;

si è tignude a Udin, tal Salon d'Onôr "Guglielmo Pelizzo" di Palaç Mantica, in vie Manin 18, la Assemblee Gjenerâl Ordenarie de Societât Filologjiche Furlane, par discuti di chest ordin dal dî:

1. Esam, discussion e aprovazion dai documents di Belanç 2019;
2. Esam, discussion e aprovazion dai documents di Belanç di prevision 2020;
3. Variis.

Al cjape sù la presidence de Assemblee il President de Societât Filologjiche Furlane, Federico Vicario.

Daûr dal art. 10 come 3 dal Statût, stant che a la prime convocazion no si è presentât nissun, il President al declare costituite cun regolaritât in seconde convocazion la Assemblee Gjenerâl dai socis de Societât Filologjiche Furlane "Graziadio Isaia Ascoli". Il President al propon Feliciano Medeot, Diretôr de Societât, tant che segretari verbalizant de Assemblee; la Assemblee e fâs buine la propueste.

Il President al domande a ducj i presints di rispîetâ un moment di corot par ducj i socis che a son mancjâts vie pal 2019 e tai prin mêis dal 2020.

Si passe duncje al exam dal ordin dal dî.

Pont n. 1 dal ordin dal dî:

Esam, discussion e aprovazion dai documents di Belanç 2019.

Il President al presente la Relazion morâl e, daspò, la relazion su lis ativitâts dal 2019. A conclusion, il President al passe la peraule al Tesorîr de Societât, Carlo del Torre, che al presente il rendicont di gjestion 2019 e il stât patrimoniâl ai 31.12.2019, che al evidenzie un risultât economic de gjestion negatîf par un impuart di 46.347,79 euros e al propon di doprâ lis risiervis par cuvierzi la pierdite.

Al interven il President dai Revisôrs dai Conts, Carlo Plet, che al lei la relazion dant parê positîf su l'aprovazion dal Belanç 2019 e su la propueste di doprâ lis risiervis par cuvierzi la pierdite dal esercizi.

Dopo de relazion e dai interventi, si passe a votâ il Belanç 2019 e la propueste dai amministrazôrs di doprâ lis risiervis par cuvierzi il risultât negatîf di gjestion 2019, che a vegnin fâs bogns a maiorange cul unic vôt contrari di Adelvis Tibaldi e l'uniche astension di Renzo Ciutto.

Pont n. 2 dal ordin dal dî:

Esam, discussion e aprovazion dai documents di Belanç di prevision 2020.

Il President al presente lis liniis di ativitât de Societât pal 2020 e il prospect dal Belanç di prevision pal an in cors. Si passe duncje a la votazion dal Belanç di prevision 2020 e dal Belanç dal trienât 2020-2022, ch'al ven fat bon a maiorange cul unic vôt contrari di Adelvis Tibaldi e l'uniche astension di Renzo Ciutto.

Pont n. 3 dal ordin dal di:

Variis.

Il President al passe la peraule ai socis.

A intervegnin i socis:

- Adelvis Tibaldi al domande se nol jere il câs di rimandâ l'Assemblee in relazion ae situazion determinade dal Covid-19.
Il President Vicario e il Tesorâr del Torre a rispuindin che la Societât Filologjiche e à cjapât dutis lis precauzions dal câs tal rispiet des ordinancis;
- Adelvis Tibaldi, al lamente la diminuzion dal numar dai socis de Filologjiche e la pierdite di identitât furlane, in gjenerâl, ancje pal disinterès de Universitât dal Friûl, e dal abandon dal teritori. Al domande che la Filologjiche e cjapi posizion su chei cantins. In cont de ristrutturazion fate in sede, a Udin, al domande ancje un intervent par permeti ai pidimentâts l'acès al Salon, come za mutivât te Assemblee dal 2018: al domande, par cheste reson, lis dimissions dal President. Ultime cuistion e rivuarde lis modificjis dal Statût sociâl, tal mê di Lui, in particolâr pai tiermins di comunicazion ai socis des modificjis statutariis e la gjestion di chê Assemblee;
- Renzo Ciutto al torne su la necessitât di doprâ di plui la lenghe furlane tes ativitâts e tes publicazions;
- Rosalba Perini e interven su la presince des feminis in Filologjiche, in particolâr tal setôr de istruzion, laudant l'ativitât dal DocuScuele pe formazion dai insegnants e la produzion dai materiâi didactics;
- Matteo Venier al ringrazie il President pal so lavôr e i conferme la sô fiducie;
- Renzo Medeossi, Pierino Donada e Franco Colussi a segnalin che dute la societât furlane, e no dome la Filologjiche, e varès di impegnâsi a pro de lenghe, de culture e de identitât de nestre tiere. Une vore impuartant al sarès ancje cjatâ formis di division e di unitât tra dutis lis componentis de societât furlane;
- Pier Giorgio Scippa al invide cui che al critiche a candidâsi a la Presidence de Societât.

Il President al rispuint ai intervencs e al segnale che, par ce ch'al inten l'acès a Palaç Mantica ai pidimentâts, si à di cirî lis risorsis finanziariis par permeti l'investiment, ricuardant ancje che il Palaç al è un ben vincolât de Soreintendence.

Stant che nol è altri ce discuti, la Assemblee si siere a 11.45.

Udin, ai 8 di Març dal 2020

Il segretari verbalizant
Feliciano Medeot